

Dörfligeischer 1987

Der Ronald Reagan wott als Friedensängel schyne,
Nur hett's zwöi Hörnli über sir' ängelhafte Miene,
Das isch sys zwöite Ich, wenn är, es isch zum lache,
Kei Ahnig hett, dass är tuet Waffegschäftli mache !

Am Dagon gfallt's im Stadtrat nach em ne Johr scho nümme,
Offebar cha-n-är für dä Poschte no zweni guet schwümme,
Ir Politik, do bruucht's, mir tüe nid übertrybe,
Doch meh als Schwümbbewegige, für über Wasser z' blybe !

Rächts isch ds Gas, nei, ds Gas isch links, rächts isch zum Halte,
Am Alfons sy Glatze berchunnt so richtige Dänkerfalte,
Und bis är ändlesch der richtig Hebu cha verwütsche,
Tuet är füüf Chääre zu Schrotthüüffe zämetütsche !

Was üsi Oberbouer i d' Landschaft ine steue,
Vo däm wird i tuusig Johr kei Schwanz meh öppis verzeue,
Und dass dä Värs e Tatsach isch, das isch bewiese:
Chuum füzgig Johr alt, muess me ds Capitol abrisse !

Bim FC Biel chöi si syt letscht Johr nümme schutte,
Si ligge meh im Gras desume und breiche Mutte,
Viellech sött ihne e Sponsor e Blindehund überreiche,
Mir hoffe sehr, si würde so ds Goal besser breiche !

Furgler ade und Egli ade, mir tüe fasch plääre,
Für d' Schwyzer Politik syg das e Verluscht, e schwäre,
Doch ou üs Geischer cha das dürenanger bringe,
Vo weune Bundes-Chlöis chöi mir no Värslis singe ?

D' Oestriicher heig es Wundermittel gäge ds Verliere,
Es gäb e Wachs, wo unger de Schy tüeng explodiere,
Doch wenn's de chlepft, isch ds Unglück do, das isch nid gloge,
Denn vor Schreck si vieli vo ihne a Ranze gfloge !

Dass üs d' Chemische mit allne Lische d' Umwält vergifte,
Dene Giftmischer cha me kei Medaille stifte,
Nei mi müessti eigentlech seriös dra dänke,
Pro tuusig toti Fisch ei Chemiker z' ertränke !